

Kayëta ixinëm ir Timote in

Lilaya in

Akayëta aŋo ex akinëm and yëgwën baŋo Pol Timote aŋ. Epela el dëŋ baŋo feland mondako gayikwa anang nang baxo mëne ecës el ðam ex. Pol axwitan xwitan baŋo mëne bër fana këbi Kaxanu eni pemërand Atëfëtan and Yesu bën ani kor na eni dind andiyen aŋo xarak aŋi cëmura ex na. Mëŋ baŋo felaxënënd Timote exo kapina ang šoroda fo. Barikan eŋi kwëyëtand bër wër këbi ecampëre, gë batakëra, do gë bër kë yepënënd ekwëta bën.

Er ex gër akayëta in:

End bapela band yël baŋo Timote eŋ: 1.1–2.26.

End ekapina do gë emëlaya ed ekwëta xali gër eŋata eŋ: 3.1–4.8.

Bepelatar beŋ do gë ofelar ol: 4.9–22.

Ecëmar el

1 ¹ Wëno Pol, parëxanda ir *Yesu *Kërisët hi këme ang yandi këŋo Kaxanu ak. Mëŋ fana ke me tëtëtërand end aniyen and beya baxo ayël këbo yël paŋ gë Kërisët eŋ. ² Wëj Timote këmi yëgwënënd, wëj ar ex asëniwën ar pëlôt gër yomb iram an. Awa Faba Kaxanu do gë Yesu Kërisët, Axwën areŋi an, yëlëleni oyekax ol, gë axayënan in do gë obetak ol.

End ecëkwa do gë ekemën eŋ

³ Ašëkwa këmo šëkwand Kaxanu, mëŋ ar këmo riyenind ang bano riyeninënd bëxarëk bëram ak^a. Ašale këmo šalend gë onden onjekax, do nand këme šalerand yo, hik gëmëd, hik goyat, wëj ašalen këmi šalenënd. ⁴ Mokofi xofi ke do aŋandi yandi ke mi watëdo exe nëngandëraxën, ga këme xwitand ang šar baxi ongwën and baxe felarënde ak. ⁵ Axwita këme xwitand bëte ekwëta ed ðal ed xwëta këyo *Kërisët el. Ekwëta elo gër Loyis, ejix isoxari yānawëk, bëtaxënëk gër norix Enis. Do aye nang këme wëj bëte ašot šot këy ekwëta elo. ⁶ Mëŋ ex, kemënalil anjëla and yël ki Kaxanu and šalen këmi mokwëtan otaxan aŋ. Kërey ðangangan na këdi kë riwa. ⁷ Enimin angoc and yël këbo Kaxanu aŋ, and gë ojaŋ, and gë aŋana, do and gë orenik exo, axo gi ex

^a1.3 Bëxarëk bër Pol bën Bëšëwif bër bax sëfënd aye end Kaxanu hi bani ang rek gër kayëta ir Bëfilip 3.4–5 ak.

na angoc and gë anjiÿ. ⁸ Mal ey torond në end Atëfëtan and Yesu ey ang këme sorond wëno ak. Deyarayind osede or Axwën arebi ol, kërexi cëfënanënd na. Bëte kërexi cëfënanërand na endam ey, wëno andepëra andexëm aÿ. Barikan toroye në end Atëfëtan ey gë panga ind Kaxanu iÿ.

⁹ Kaxanu, gë panga iÿo fexën këbo do waceli këbo owënëk ol, xarak ax gi ex na de ga ri këne benjekax, barikan ga fëna baxo exo di mondako në end oyekax or yël këbo paß gë Yesu Kërisët ey, damana exo dixën ngwën iÿ.

¹⁰ Oyekax olo şanayak gërëgako and şanayaw ko Yesu Kërisët, Afexën arebi aÿ. Mëñ rëxëtëk panga ind ecës iÿ do nëcëtënegu këbo angoben and aniyen aÿ, aniyen and gë ecës këm aÿ, aniyen and këbo nangënënd Atëfëtan aÿ.

¹¹ Gë Atëfëtan aÿo hi këme afemëra, parëxanda, do asëy'ali.

¹² Bëte gër andiyen aÿo buÿa këme toro ind këme sorond iÿ, bari axe cëfënan na. Gayikwa aye nang këme noÿo ex ar xwëta këmo an, do mopëni fëni ke mëne axor ko xor exo kaxa er xwëtënan ke in, xali yatir akey apelatar.

¹³ Mëlayal eyey'an emënëk ed wëleli këy'e elo, gilex eyey'an ed këy' sëf asëf gë ekwëta ed xwëta këy'o Yesu Kërisët el do gë aÿana and hik gër ndexëm aÿ. ¹⁴ Kwëtayal gër emëkw edey benjekax bend xwëtënan ki Kaxanu paß gë Angoc Amënëk and lëgëk gër ola orebi aÿ.

End Onesifor do gë ekun edexëm ey

¹⁵ Timote, anang nang këy' mëne dek bër gër ebar ed Asi bën şapëran ke, ado Fişel do gë Erëmoşen dëñ gër enga eyo exëni.

¹⁶ Axwën *Yesu mëlayalebi gë axaÿënan Onesifor do gë ekun edexëm el gayik mëñ laÿ baxe felënd me kemëna. Ado ga hi këme andepëra, abarjo şëfënan na endam ey. ¹⁷ Ecëñëxët and yow ko ro gër Rom aÿ, aşalara şalara ke gë obal osëm xali wat ke. ¹⁸ Awa Axwën Yesu mëlayaleÿo gë axaÿënan ir Axwën Kaxanu in, xali yatir akey apelatar. Wëj dëñ anang nang këy' nëmëc bela dek ang rëcara ke gër Efes ak.

End şoroda ir Kërisët ey

2 ¹ Awa wëj cëñ asëñiÿwën, kemënëlexi *Yesu *Kërisët gë oyekax orexëm ol. ² Do bebër wëleli këy'e ga këme sëfët mërëxand ir

otede odanjëm bën, kwëtënanëlëbi bela bër mokwëta, bër kë xor bën bête enëbi tëy'alind bëshëxe. ³ Ang šoroda iyekax ir Yesu Kërisët fo, mal ey' torond ang këme sorond wëno ak. ⁴ Angëmëne ar yëlayak gër ošoroda an aÿandi ÿandi këjo eŋo nënganënd alëngw arexëm an endexëm eŋ, axo kwëndand na bend aniyän and bër ax gi ex na ocoroda beŋ. ⁵ Ar kë xašërënd an, ala aŋo cosënd na angëmëne axo tëf ex na šenene bacariya band okašër baŋ. ⁶ Aÿan ar sëwëk gër ošënga orexëm an ÿapëk exo gi aÿanar ar kë y'amb er ko xana in. ⁷ Pënilexi er këme rend in: Axwën an ayël ki yël onden ond exi pënixënënd beÿ dek oŋ.

⁸ Kwitayind end Yesu Kërisët eŋ, mëŋ ar xanik gër ecës an, mëŋ ar exo andëwëra and *Dafid an. Eŋo ex Atëfëtan and këme femërand aŋ. ⁹ Në end Atëfëtan aŋo këme soroxënënd xali fokëra këne nangëde ar wëndërak fo. Bari eyey'an ed Kaxanu el cëŋ, ala ax kor na exo pokëra. ¹⁰ Mëŋ ex, wëno axapina xapina këme me buŋand toro ind ex yo, eni cotaxën bela bër yata këbi Kaxanu bën apexa and gë enjaran end din ir din aŋ, and ko yëlënd Yesu Kërisët aŋ. ¹¹ Eyey'an elo ed mokwëta ex:

angëmëne gë Kërisët šës këne,
bête gë mëŋ fo këne liyade. ¹² Angëmëne axemëna xemëna këne,

bête gë mëŋ këne wunëde;
angëmëne enëŋo y'axëtaye,
mëŋ bête ay'axëta këbo y'axëtađ.

¹³ Mëŋ ar mokwëta ko bayi,
angëmëne ax bo ex na ga xwëta kënëŋone,
gayik mëŋ din ar hi ko an ko bayi.

End ariyenin ar Kaxanu eŋ

¹⁴ Awa beŋo ÿapëk ey'ëbi kwitanënd gër Amara, gër lëngw ir Kaxanu dëŋ, mëne eni kwëÿëtand ecampëre ed bend gë ofëcak këm el, ecampëre ed bend këbi nambelind bër obaxët el. ¹⁵ Wëj, kemënal ey'ëbi tëy'alind šenene eyey'an ed đal el, ey' canayaxënëđ gër lëngw ir Kaxanu ang ar xamënëk andiyen and fana këjo fo, ang ariyenin ar aŋo cëfënan na. ¹⁶ Kwëÿëtal bend kë yepënënd bend Kaxanu beŋ, tebël eyey'andëran ed ax bašënënd na ekwëta el gayik bër watak mondako bën, oyey'andëran oŋo fo këbi šapërelind gë Kaxanu. ¹⁷ Eyey'an edebën elo ang ikejën ind kë ÿañënd fo ex. Imene do gë Filet šëf gër bela bëjo hi këni. ¹⁸ Bën ga lap këni end đal eŋ, këni rey'araxënënd mëne anëka xucak ekani ed gër ecës el, do bërëmar wëlandëra këbi gër ekwëta ed xwëta këno Kaxanu. ¹⁹ Barikan Amara and rëđ ko Kaxanu aŋ,

abayi kë bayi, ang rek Oñëgw Omënëk ak: «Axwën an anang nang këbi bër xwën këbi bën.» Do «Ar kë hebëtand yo exo mac oñac or Axwën ol, ñawëtalexo osëmbak ol^{b1}!»

²⁰ Ar gë napul an, odëyamb od şot ko gër iciw̄ indexëm ok mar od otëx ex do mar od gë omak, ax gi ex na odëyamb od kaŋe do od kodî fo. Odëyamb od xalanj ok, laŋ ko rixëraxënënd, b̄arikan odëyamb okëbënaxik ok, gë bakey band ofëna fo ko rixëraxënënd. ²¹ Awa angëmëne ala exo w̄unëta do exo teb betëmbak beŋ, ata ko hi ang edëyamb ed këni rixëraxënënd yatir ofëna fo, ata ko hi ar yëlayak gër Axwën, do paß gë ola orexëm ol, ko ȳana exo dind benjekax bend ex yo.

²² Awa wëj Timote, kwëyëtal betëmbak bend këni rind ocambenjar gë odënaw̄ beŋ. Calayind or şenene ol, gë ekwëta el, gë aŋana aŋ, gë angwëlëra aŋ, do gë oyekax ol, andamat gë bela bër këŋo şalend Axwën Kaxanu gë emëkw emënëk bën. ²³ Koranëlēbi bër këbi ȳandind en yeyandëra bepënrëx, bend gë ofëcak këm bën. Anang nang këy mēne beŋo gë ekeyër fo kë hatand. ²⁴ Xarak ariyenin ar Axwën an ax ñap ex na eni keyërënd gë bela. Ecëñëxët, er ȳapëk exo gi: ar bëngw këŋo onden gër bela ðek, ar xamëk osëyali, do ar kë buŋand mbaŋ. ²⁵ Gilexo ar këbi wërëşëtënd endëmane fo bër xorëk ecampëre bën, do exo yëland mēne Kaxanu arëca këbi rëca eni nëngwët ola orebën ol ebi pënixënënd ðal in. ²⁶ Gilexo bëte ar këbi wërëşëtënd endëmane fo ebi bakaraxën onden oŋ, do eni gënjëtayaxën gër bamene band şabucara, mëŋ ar sëra babi eni dind oñandi odexëm an.

End bakey bapelatar en

3 ¹ Wëj Timote, nangël wa mēne gër bakey bapelatar, mbaŋ kë yëka. ² Gayikwa bela bën axwëj këni xwëj, do eni gi bëñan bër kodî. Afufënara këni ȳana eni pufënarand, do eni dafënarand. Aşir këno ȳana eno cirënd Kaxanu, do enëbi mëşenënd bëxarëk bërebën bën. Aşus këni ȳana eni cusënd bend Kaxanu beŋ, do ado ebi din ala enjekax ano ȳana na eno cëkwand. ³ Owëkw orebën oŋ mbaŋ kë farëdadî xali eni gi gë axayënan këm, bërena, bër gë anjus këm, bëxeÿax, bër şusëk enjekax. ⁴ Ayaxëta kënëbi ȳana enëbi yaxëtand bërebën bën, do eni gi xoÿët xoÿët. Ndafënan indebën iŋ këbi şiwën, do eni ŋan bendebën beŋ nëmëc Kaxanu. ⁵ Aliya këni ȳana eni ðiyand nangëde bër xwëta këŋo Kaxanu fo, xarak gër owëkw orebën añëp hëp këni panga ind ekwëta iŋ. Ata nacëtalëbi caw bela bërako rako bën. ⁶ Şëf gër bela bëjo exëni,

bër kë lilënd gër bëciw̄ do kënëbi yifand bësoxari bësitarak gër ekwëta bën, bësoxari bër w̄ër këbi beñëñenax bën, bësoxari bër kë sëfënd oñandi od ex yo. ⁷ Bësoxari bëjo din këni sëyand, bari din ani korënd na eni nang ðal in.

⁸ Ang bani hëpënd Yanes gë Yambëres end Moyis ak, bër kë sëy'alind benëgwêš bën mondako fo këni hëpënd eni kwëta ðal in^c. Ata bëjo bër gë onden otëmbak exëni, do ekwëta edebën el ðek y'epëk. ⁹ Barikan enëgwêš end bela bëjo eñ ðek kë fëlëtar, ang ebax end Yanes do gë Yambëres ak. Ala ax bo na ga këbi baxët.

End aniyand and Pol eñ

¹⁰ Wëj cëñ, aye sëf këy' er këme sëy'alind in, bëte aye wat këy' ang w̄ëlaya këme ola oram ak. Anang nang këy' bebër këme fëñand me di bën. Anang nang këy' bëte ekwëta edam el, ebuña ed buña këme el, ang ke balënd end bela ak, ang xemëna këme ak. ¹¹ Anang nang këy' bëte ang narëndëra këne ak, do ang soro këme gër angol and Anjecoš, gër and Ikoñom, do gër and Lisëtër ak. Bëte toro ind fe bayik ame buña ex na? Barikan Axwën an din ke racëtënd gër toro ind ex yo. ¹² Dek bër këbi y'andind eni ðiya ang këjo y'apanënd Yesu Kërisët ak bën, arixëra kënëbi y'ana enëbi dixërand. ¹³ Barikan bëy'ëñenax bën, gë bëyifa bën din këni y'ana eni mendërand do eni basënd eñëñenax eñ, enëbi nambelind bëšëxe ang nambëra këni bën ak.

¹⁴ Barikan wëj, bayil ga xwëtaya këy' bend sëy'a këy' do fëni ki mëne ðal dëñ ex beñ, ga nang këy' ako noyo sëy'ali ki. ¹⁵ Elod inëmëta ga nang këy' wa Oñëgw Omënëk ok. Awa Oñëgw Omënëk oko fo kë xor exi yël orenik ol, ey' cotaxën apexa and këbi yëlënd Yesu Kërisët bër xwëta këjo añ. ¹⁶ Oñëgw Omënëk od ex yo gër Kaxanu xaniwëk do ofëcak or kë w̄ëlawënd ol ex: osëy'ali ol, gë ewërëšët ed bër kë lifënd el, gë edebët ed bësëmbak el, gë ekaðac ed gër or šenene el, ¹⁷ exo gixën ala ar w̄ak end Kaxanu an, ar kë xorënd exo di enjekax end ex yo.

End epemëra ed Atëfëtan eñ

4 ¹ Awa Timote, gër lëngw ir Kaxanu do gë ir Yesu Kërisët, mëñ ar kë bakaw ebi kiti bela an, hi këni bëfëngw, hi këni bëšësëk, këmi xarand gë obal osëm. Axara këmi xarand në end akey and ko bakaw eñ, në end owun orexëm eñ, ² pemërayind Atëfëtan añ, dey'arayind nand ex yo, saxan ki nde, lakan ki nde. Wërëšëtindëbi

bela bën, dexërayindëbi, kemënindëbi, bujanindëbi and këyëbi sëyalirand aṅ. ³ Gayikwa në eƳow ex amëd and bela bën abi ñana na ebi ñandind or osëƳali or ɗal ol. Ga këbi Ƴana ebi kanjënd ebaxët ed oñandi odebën el, ašala kënëbi Ƴana enëbi caland bësëƳali bër bësëƳali. ⁴ Banëf bandebën baṅ këni haŵëtali gë ɗal in, do eni kwënda obaxët or bendacan. ⁵ Barikan wëj, gil gë anjus gër beƳ ɗek, buṅayind ado eƳ torond, pemërayind Atëfëtan aṅ, balëkënalijind andiyen and fana ki Kaxanu aṅ.

⁶ Wëno cëṅ, anëka hi këme ang ešëb-ceb ir këni xošënd në šadaxa fo, do oñe ondam oṅ dëṅ hatëguk mondako. ⁷ Anëka xaxër këme okaxër ond Ƴap bax me kaxër oṅ, añata ñata këme andiyen andam aṅ, do aye wëlaya këme ekwëta ed xwëta këmo Kërisët el. ⁸ Ata elod gërëgako, acosa and or šenene and fenin ke aṅ, Axwën Yesu, mëṅ ar ex axiti ar šenene an, ayël ke yëlëf yatir akey apelatar. Ayël këbi yël bëte bër ñan këṅo do këno šënind exo bakaw bën, axi gi ex na wëno fo.

Bepelatar beṅ

⁹ Kemënal eƳ Ƴow aƳand ro gër ed hi këme. ¹⁰ Demas cëṅ, aƳaṅëta Ƴaṅëta ke gayik bend gë okey oko xëbënan këṅo nëmëc, kwël ye ko ɗe gër Tesalonik. Këresaṅës aƳe ye ko gër ebar ed Galasi, do Tit, gër ed Dalëmasi. ¹¹ Luk gabat bayik ro gë wëno. Awa tëfërëgudën gë Marëk and këƳ Ƴowënd aṅ gayik mbaṅ ke rëcati gër andiyen. ¹² Alaŵën laŵën këmo Tišik gër Efes. ¹³ And këƳ Ƴowënd aṅ, mëlaliwëd ocud otëm ond sebëgu bame gër Tërowas, gër iciŵ ind Karëpos oṅ. Mëlaliwëd bëte bakayëta baṅ, adofa bakayëta band monëkw baṅ. ¹⁴ Alekësandër, asap an, mbaṅ rixëra ke. Axwën an, aŵašën këṅo ŵašën bandixa bandexëm baṅ. ¹⁵ Wëj bëte kwëŷëtalo gayik mongwërëna wërëna baxo ga xey këṅo osëƳali orebi ol.

¹⁶ Yatir wac ke añanar axiti an, gabatak ax Ƴow bana exe ɗaṅëta: ɗek šapëran bane. Bari Kaxanu kërebi nëp na në eno. ¹⁷ Axwën an wa laṅëta baxe, do xemën ke, eni wëlxën Atëfëtan aṅ paɓ gë wëno, ɗek benëṅ beṅ. Do Axwën an mondako racët ke gër etëƳ ed yëraṅ. ¹⁸ Aracët ke racët gër eñëṅenax end ex yo, afexën ke fexën, do exe mëla Ƴaṅ gër orën, gër ed wun ko. Duwanëṅone mëṅ ar gë enjaran end din ir din an! Amen!

Ofelar ol

¹⁹ Ašëma këmëni šëmand Përisëka, gë Akilas do gë bër ekun ed Onesifor bën. ²⁰ Erasët cëṅ, gër Koreṅët bayiw ko, do Tërofim fo sebëgu këmo ašëxwëra gër Mile. ²¹ Kemënal eƳ Ƴow ɗamana ex

ɣatêgu ay'em in. Ebulos, gë Pudenjës, gë Linos, gë Këloja, do dëk
bëmaÿe bëj ki šëmand. ²²Awa Axwën an gilexo gër onden ondey!
Yelëlenun oyekax orexëm ol!